



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr. 108/2019

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Zyhdi Haziri kryesues, Kymete Kicaj dhe Ferki Xhaferi anëtarë, me pjesëmarrjen e Zyrtares Ligjore Vlerona Maliqi, duke vendosur përkitazi me ankesat e subjektit politik Lëvizja VETËVENDOSJE, dhe Organizatës Joqeveritare BIRN dhe Internews Kosova, që të dyja me seli në Prishtinë, paraqitur kundër koalicionit AAK-PSD, me seli në Prishtinë, për shkak të thyerjes së Kodit të Mirësjelljes për subjektet politike, për Zgjedhjet e Parakohshme për Kuvendin e Republikës së Kosovës, që do të mbahen më datë 06.10.2019, në seancën e panelit të mbajtur më datë 30.09.2019, mori këtë:

V E N D I M

PRANOHEN të bazuara ankesat Anr. 108/2019 e datës 27.09.2019, e paraqitur nga subjekti politik Lëvizja VETËVENDOSJE, dhe ankesa Anr. 114/2019 e datës 27.09.2019, e paraqitur nga Organizata Joqeveritare BIRN dhe Internews Kosova, të dyja me seli në Prishtinë, koalicionit AAK-PSD, me seli në Prishtinë, i SHQIPOHET gjobë në lartësi prej 9,500.00 (nëntëmijë e pesëqind) euro, të cilën detyrohet ta paguaj në afat prej 15 ditësh, nga plotfuqishmëria e këtij vendimi, nën kërcënim të përmbarimit.

A r s y e t i m

PZAP-i, më datë 27.09.2019, ka pranuar ankesën Anr.108/2019, nga subjekti politik Lëvizja VETËVENDOSJE, dhe ankesën Anr.114/2019, nga Organizata Joqeveritare BIRN dhe Internews Kosova, të dyja me seli në Prishtinë, të paraqitura kundër koalicionit AAK-PSD, me seli në Prishtinë, me të cilat pretendohet se kandidati për kryeministër të Kosovës nga radhët e koalicioni AAK-PSD, Ramush Haradinaj, më datë 26.09.2019, përmes llogarisë së tij në facebook, ka bërë fushatë me Policinë e Kosovës, ashtu që ka shpërndarë një video ku shihen pjesëtarët e uniformuar të Policisë së Kosovës dhe një tekst i cili përcjellë videon e i cili thotë “2000 policë shtesë deri në fund të mandatit”, veprim ky i cili sipas tyre përbën shkelje të Rregullës Zgjedhore “Fushata e Zgjedhjeve dhe Njoftimi për Ngjarjet Politike”.

Paraqitësit e ankesave, si dëshmi për pretendimet e tyre, ankesave të paraqitura u kanë bashkangjitur një fotografi dhe një video si provë materiale.

Paneli, në bazë të nenit 13 paragraf 2, të Rregullave dhe Procedurave të PZAP-it, ka vendosur të bashkon ankesat e lartcekura dhe ti trajton si një ankesë, për shkak të natyrës së njëjtë të rasteve dhe pretendimeve, dhe për të gjitha të vendos me një vendim për shkak të efikasitetit dhe ekonomizimit të procedurës.

PZAP-i, në kuptim të nenit 7 paragrafi 1, të Rregullave dhe Procedurave të PZAP-it, e ka njoftuar koalicionin AAK-PSD, për ankesat që janë bërë ndaj tij dhe ka kërkuar që të përgjigjet ndaj ankesave në fjalë deri më datë 28.09.2019, në ora 16:00. Koalicioni AAK-PSD, në përgjigjen në ankesë të datës 28.09.2019, theksoi se është i vërtetë fakti se në spotin reklamues të këtij subjekti politik janë përfshirë zyrtarë policor, por sipas tyre kjo ka ndodhur

si pasojë e një gabimi të paqëllimshëm nga ana e kompanisë së kontraktuar, e cila ka realizuar këtë reklamë, sepse janë munduar ta mbulojnë me sekuenca filmike planin e koalicionit në fushën e sigurisë për mandatin e ardhshëm qeverisës. Më tej ka shtuar se me të marrë njoftimin për paraqitjen e ankesave kundër tyre, koalicioni AAK-PSD, ka kontaktuar kompaninë në fjalë dhe ka kërkuar nga ta që të shkëpus nga spoti sekuençën e cila bie ndesh me rregullën zgjedhore. Në fund ka kërkuar nga PZAP-i, që të shqiptojë një dënim të arsyeshëm dhe gjatë matjes së dënimit të marrë parasysht veprimet e koalicionit AAK-PSD, për evitimin e shkeljes dhe respektimin e rregullave zgjedhore.

Koalicioni AAK-PSD, përgjigjes në ankesë, si provë i ka bashkangjitur disa njoftime që koalicioni në fjalë ka bërë në rrjetet sociale për anëtarët dhe simpatizantët e tij lidhur me respektimin e rregullave zgjedhore.

PZAP-i, pasi që shqyrtoi dhe analizoi shkresat e lëndës në kuptim të nenit 117 paragraf 2, të LZP-së, gjeti se: **Ankesat janë të bazuara**, për këto arsye:

Paneli, pas shikimit të shkresave të lëndës si CD-në, e ofruar si provë materiale, e cila është publikuar në llogarinë e facebook-ut, të kandidatit për kryeministër të Kosovës, Ramush Haradinaj, përgjigjes në ankesë të koalicionit AAK-PSD, dhe shkresave tjera të lëndës, ka vlerësuar se nga ana e koalicionit AAK-PSD, është shkelur Rregulla Zgjedhore Nr.13/2013, për *“Fushatën e Zgjedhjeve dhe Njoftimin për Ngjarjet Politike”*, e ndryshuar dhe plotësuar me Rregullën Zgjedhore Nr.20/2019 të datës 26.09.2019, pasi që koalicioni në fjalë, me qëllim të promovimit të programit të subjektit të tyre politik, gjatë fushatës zgjedhore, në spotin e tij zgjedhor ka përfshirë pjesëtarë të uniformuar të Policisë së Kosovës, veprim ky i cili bie në kundërshtim me dispozitën e nenit 5 par. 2, pika c), të rregullës zgjedhore të lartpërmendur, ku ndër të tjera parashihet se: *“Në fushatën e zgjedhjeve të asnjë subjekti politik të certifikuar nuk mund të përfshihen kategoritë: ...; c) pjesëtarët e uniformuar të Policisë së Kosovës dhe personeli i tyre, përveç kur janë të angazhuar sipas detyrës zyrtare”*.

Paneli me rastin e vendosjes së gjobës si në dispozitiv të këtij vendimi, ka marrë parasysht rrethanat si në vijim:

- Natyra e shkeljes dhe ndikimit të mundshëm të saj në procesin zgjedhor;
- Shkallën dhe peshën e shkeljes;
- Nëse subjekti politik ka marrë pjesë në zgjedhjet e mëparshme, konsiderohet se kanë qenë të njoftuar me obligimet dhe përgjegjësit gjatë procesit të fushatës;
- Nëse subjekti politik ka bërë shkelje të ligjeve zgjedhore në fuqi në këto zgjedhje apo në zgjedhjet e mëparshme në Kosovë; si dhe
- Shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura më fushatën zgjedhore.

Paneli, mori parasysht të gjitha rrethanat në rastin konkret, se dy subjektet e koalicionit në fjalë, subjekti politik Aleanca për Ardhmërinë e Kosovës (AAK) dhe Partia Socialdemokrate (PSD), kanë marrë pjesë edhe në zgjedhjet e kaluara që do të thotë se janë njoftuar me rregullat zgjedhore, dhe përkundër këtij fakti gjatë fushatës zgjedhore, në spotin e tyre zgjedhor kanë përfshirë pjesëtarë të uniformuar të Policisë së Kosovës, veprim ky i sanksionuar me dispozitat e lartëcekura të rregullave zgjedhore.

Po ashtu si rrethanë, PZAP-i e mori edhe faktin që koalicionit në fjalë, i'u dha mundësia për tu përgjigjur në ankesë dhe ta përmirësojë shkeljen e bërë, mirëpo subjekti politik megjithëse

e ka pranuar shkeljen e bërë, nuk ka ofruar asnjë dëshmi lidhur me atë se është bërë përmirësimi i shkeljes siç kërkohet me nenin 120 paragrafi 1 pika a) e LPZ-së, veprime këto të cilat kanë ndikuar në lartësinë e gjobës së shqiptuar, në kuptim të nenit 35 paragrafi 2, nenit 120 paragrafi 1 pika c) të LZP-së dhe nenit 5 paragrafi 2 i Rregullës Nr. 01/2012, Për Kategorizimin e Sanksioneve dhe Gjobave të PZAP-it.

Nga arsyet e theksuara me lart, e në kuptim të nenit 118 par.1 dhe nenit 120 par.1 pika c) të LZP-së, u vendos si në dispozitiv të këtij vendimi.

Paneli Zgjedhor për Ankesa dhe Parashtrësia
Anr.108/2019 më datë 30.09.2019

Kryesuesi i Panelit
Zyndi Haxhi



Këshillë Juridike: Kundër këtij vendimi është e lejuar ankesa sipas nenit 118 par.4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes pranimit të këtij vendimi.